

16 JUL 1996  
Parlimen-Pendatang  
80 PENDATANG TANPA IZIN MATI DI DEPOT TAHANAN

KUALA LUMPUR, 16 Julai (Bernama) -- Seramai 80 pendatang asing tanpa izin yang ditahan di depot-depot tahanan Imigresen di seluruh negara meninggal dunia sehingga 15 Jun lepas.

Perdana Menteri Datuk Seri Dr Mahathir Mohamad berkata mereka terdiri daripada 31 warganegara Indonesia, Bangladesh (38), India (5), Myanmar (4), Nepal (1) dan Pakistan (1).

Mengikut pecahan kematian di depot tahanan, sebanyak tiga orang mati di Depot Juru, Pulau Pinang; Depot Langkap, Perak (5); Depot Semenyih, Selangor (43); Depot Lenggeng, Negeri Sembilan (8); Depot Macap Umboo, Melaka (4); Depot Pekan Nenas, Johor (12); Depot Kemayan, Pahang (4) dan Depot Tanah Merah, Kelantan (1).

Beliau berkata demikian dalam jawapan bertulis kepada Ketua Pembangkang, Lim Kit Siang (DAP-Tanjung) di Parlimen, hari ini.

Dr Mahathir berkata semua pendatang asing tanpa izin yang meninggal dunia di depot-depot Imigresen telah dihantar ke hospital daerah yang berhampiran untuk diperiksa.

Antara lain kematian pendatang asing tanpa izin itu disebabkan oleh penyakit seperti beri-beri, "viral fever", "broncho pneumonia", "acute pulmonary oedema", "septicaemia", "acute renal failure", "pericardial effusion", "pneumoeytic carini", "staphylococcal aureaus endocarditis" dan AIDS.

Mengenai Lembaga Pelawat Bebas, Dr Mahathir berkata sehingga kini lembaga telah melawat ke tujuh depot daripada 10 depot di seluruh negara.

Selepas lawatan ke semua depot Imigresen, Lembaga Pelawat akan mengedarkan satu laporan lengkap mengandungi hasil lawatan itu dan cadangan serta syor tertentu kepada kerajaan. -- BERNAMA

HS NAK